

**FUAFUAGA FAATAATITIA MO LE
VA'AIA LELEI O I'A MA FIGOTA**

A LE AFIO'AGA

O

**VAOVAI
FALEALILI**

(Tusia : Aso 25 Novema, 1999)

Saunia:

Pule mamalu a Alii ma Faipule ma tagatanuu o le afio'aga o Vaovai Falealili, aemaise le lagolagosua a le Ofisa o Faigafaiva o le Matagaluega o Faatoaga ma Faigafaiva.

FAASOLOGA

| | | |
|----------|---|-----------|
| 1 | Faatomuaga | 4 |
| 2 | Faamatalaga e uiga i le Afio'aga | 4 |
| | 2.1 Faamatalaga o Foliga Va'aia faalenatura o le Afio'aga | 4 |
| | 2.2 Faamatalaga o faigafaiva a le Afio'aga | 5 |
| 3 | Tulafono i Aso ua mavae ma Aso nei | 6 |
| | 3.1 Aotelega o Tulafono o le Siosiomaga o le gataifale i Aso ua mavae ma ona Po nei | 6 |
| 4 | O lenei Fuafuaga Tatau | 6 |
| | 4.1 Autu | 6 |
| | 4.2 Tapenaga | 7 |
| 5 | Fuafuaga Faataatitia | 8 |
| | 5.1 Ina ia faamalosi tulafono faale-nuu e faasaina ai faigafaiva le talafeagai : fanai'a, ava niukini ma vailaau oona | 9 |
| | 5.2 Ia faasalalauina Tulafono a le Afio'aga | 10 |
| | 5.3 Ia aoina mai i uta le alamea ma faatama'ia ai | 10 |
| | 5.4 Ia faasaina tu'iga ma fa'amo'a | 11 |
| | 5.5 Ia faasaina fagotaga mai isi Afio'aga | 12 |
| | 5.6 Ia taofia le toe lafoa'i o lapiasi i le gataifale | 12 |
| | 5.7 Ia faasaina ona toe fagotaina mai i'a ma figota laiti | 13 |
| | 5.8 Ia faasaoina ma faateleina amu | 13 |
| | 5.9 Ia faasa ona toe taina ma faatama'iaina togatogo | 14 |
| | 5.10 Ia faasaina upega ma tili mata-nini'i | 14 |
| | 5.11 Ia faasa ona toe lauina fugafuga, mama'o ma sea, ma isi figota o lenei ituaiga mo le faatauina atu i maketi i fafo | 15 |
| | 5.12 Ia taofia le faaaogaina o mea manava (fagu'ea) ma moliuila i faigafaiva i po | 16 |
| | 5.13 Ia taofia le la'u'eseina o oneone mai le gataifale o le afio'aga | 16 |
| | 5.14 Ia iloiloina le tulaga talafeagai o le faasaoina o se vaega o le gataifale o le Afio'aga | 17 |
| | 5.15 Ia iloiloina le tulaga talafeagai ma le lei o le gataifale mo le tufaina atu ma le faa-faatoagaina o nisi figota | 18 |
| | 5.16 Ia una'ia faigafaiva i tua'au ma aoaoga mo faigafaiva | 19 |
| | 5.17 Ia faaaogaina le Mana o Talosaga | 20 |
| 6 | Talosaga | 20 |
| | 6.1 Talosaga a le Afio'aga | 20 |
| 7 | Toe Iloiloina o lenei Fuafuaga Tatau | 20 |

Faalupega o
VAOVAI FALEALILI

Susu le Susuga i le Tapa'au Faasisina

Afifio Usoalii

Alalatai Lufilufi ma le To'avalu o

Taulauniu

1. FAATOMUAGA

O faigafaiva i Samoa e taua tele aua o se tasi lea o auala e maua ai le fofoga taumafa aemaise lava i alalafaga ma afio'aga i tua. I le tele o afio'aga, latou te le'o faatauaina le va'aia lelei o le tamaoaiga ma le siosiomaga o le gataifale. O le aumaia le faaogaina o ituaiga faigafaiva faa-onapo nei, e iai mea meanava, upega ma tili mataninii, ma vailaau oona e faamata faigofie ai ma tele i'a maua, ae o loo faatama'ia ai le siosiomaga o le gataifale ma ona tamaoaiga. O le faatinoina foi o atinae i le gataifale, ua faaleagaina ai le tele o nofoaga ma le miliona o meaola o loo nonofo ma tautuufua ai. Ina ia faasaoina mai lea tulaga, ua faatuina ai e le Vaega o Faigafaiva o le Matagaluega o Faatoaga ma Faigafaiva se Polokalame mo le Pulega o le Si'osi'omaga o le Gataifale, ma le Va'aia Lelei o I'a ma Figota, ina ia fesoasoani i le fausiaina o se Pulega faa-faigafaiva i alalafaga ma afio'aga e faasao, pulea ma fuafua tatau le faaogaina o le tamaoaiga o le gataifale o Samoa.

2. FAAMATALAGA E UIGA I LE AFIO'AGA

2.1 Faamatalaga o foliga va'aia faale-natura o le Afio'aga

FAALAUATELE

| <u>FAAMATALAGA</u> | <u>AOFAIGA</u> |
|---|----------------|
| O le faitau aofai o tagata o lena alalafaga: | 700 – 800 |
| O le aofai o aoga i totonu o lena afioaga : | |
| Aoga Tulagalua | 1 |
| Aoga Faataitai | 1 |
| O le aofai o falesa i totonu o le alalafaga : | |
| E.F.K.S | 1 |
| Mamona | 1 |
| O le umi o le aau o le afio'aga (mita) | 600 mita |
| O le mamao o le aau mai le matafaga (mita) | 400 mita |
| O le loloto o vaega e aupito sili ona loloto o le aloalo pe a pe le tai i le taimi nei | 5 futu |
| O le loloto o vaega e aupito sili ona loloto o le aloalo pe a pe le tai i taimi ao lei afaina i afā | 5 futu |

FAALAUATELE

| <u>FAAMATALAGA</u> | <u>AOFAIGA</u> |
|--|----------------|
| O le faitau aofai o tane faifaiva e fagoga i le sili atu ma le tasi le aso i le vaiaso | 80 – 100 |

| | |
|--|---------|
| O le faitau aofai o tina faifaiva e fagogota i le sili atu ma le tasi le aso i le vaiaso | 60 – 80 |
| O le aofaiga o tagata e fagogota i tua'au mai le tasi le aso i le vaiaso | 15 – 20 |
| O le aofaiga o paopao e faaaogaina mo faigafaiva i totonu o le afio'aga nei | 30 |
| O le aofaiga o alia fagota o loo faaaoga mo faigafaiva a le afio'aga nei | Leai |
| E faatagaina ni tagata mai nisi alalafaga e fagogota i lo outou gataifale? | Ioe |

2.2 Faamatalaga o faigafaiva a le Afio'aga

| <u>Ituaiga I'a /Figota</u> | <u>Ituaiga Faigafaiva</u> | <u>Taimi faaalu mo le 1 le tau'i'a/ 10 I'a/ Ofu</u> | <u>Taimi Nei</u> | <u>10 Tausaga ua te'a</u> |
|---------------------------------|---------------------------|---|------------------|---------------------------|
| <i>I'a maua soo se (5)</i> | | | | |
| 1. Alogo | Mata / Fana | 2 – 3 itula | | ½ itula |
| 2. Pone | Mata / Fana | 2 – 3 itula | | ½ itula |
| 3. Fuga | Mata / Fana | 2 – 3 itula | | ½ itula |
| 4. Anae | Mata / Fana | 2 – 3 itula | | ½ itula |
| 5. Mataleele | Mata / Fana | 2 – 3 itula | | ½ itula |
| <i>Figota maua soo se (3)</i> | | | | |
| 1. Fugafuga | Fai fugafuga | 2 – 3 itula | | ½ itula |
| 2. Alili | Lama | 2 – 3 itula | | ½ itula |
| 3. Aliao | Lama | 2 - 3 itula | | ½ itula |

| <u>Ituaiga I'a /Figota</u> | <u>Isi Taumafa o le sami</u> | <u>Taimi faaalu mo le 10 mea ua ta'ua</u> |
|----------------------------|------------------------------|---|
| 1. Fao tuitui | Tuitui | 2 – 3 itula |
| 2. Fai faisua | Faisua | 2 – 3 itula |
| 3. Mata / Fana | Ula | 2 – 3 itula |
| 4. Mata / Fana | Pa'a | 2 - 3 itula |
| | Sea (5 lapoa, laiti) | 2 – 3 itula |
| | Laumei | 2 – 3 itula |

VAEGA TAUA O LE SIOSIOMAGA MO FAIGAFIIVA

| <u>Vaega</u> | <u>Vaega Taua (sikuea mita)</u> | |
|--------------|---------------------------------|-------------------------------|
| | <u>Taimi Nei</u> | <u>Sefulu Tausaga ua te'a</u> |
| Togatogo | 400 m ² | > 700 m ² |
| Amu | 500 m ² | > 700 m ² |

Vaovao o le Sami

500 m²

500 m²

3. TULAFONO I ASO UA MAVAE MA ASO NEI (Siosiomaga o le Gataifale ma Faigafaiva)

3.1 Aotelega o Tulafono o le siosiomaga o le gataifale ma faigafaiva i aso ua mavae ma ona po nei.

Tulafono a le Afio'aga o Vaovai Falealili i Aso ua Mavae

O le faasaina o faigafaiva le talafeagai:

- Fanai'a
- Ava niukini
- Vailaau oona

O nei tulafono o lo'o faamamaluina ma amanaiaina e pei ona sa iai i le taimi muamua i totonu o le afio'aga o Vaovai. Ae peitai, e le o mamalu i nai vaitaimi ona o le le amanaiaina e tagata o le afio'aga atoa ai ma isi afioaga o nei tulafono.

O nisi o mafuaaga e pei ona ta'ua e aofia ai:

- Leai o se lagolago mai le Malo
- O nisi o tagata o loo mafaufau mo le taimi nei ae le mafaufau i le taimi o i luma faapea foi le lumanai o tupulaga.

O nei mafuaaga uma o loo aafia i le Fuafuaga mo le Pulega o le Siosiomaga o le Gataifale ma le Va'aia Lelei o i'a ma figota.

E le gafatia na o le malosia faaletulafono a le Malo ona malu puipuia ai le siosiomaga o le gataifale ma ona tamaoaiga. E utiuti tulaga tau tupe ma to'agaogao foi le afaigaluega a le Malo latou te faamalosalia ma unaia tulafono tau faigafaiva i nuu taitasi o Samoa. O le fofu talafeagai o lo'o i aao o tagata o loo soifua ma alaala i le afio'aga faatasi ai ma le faamalumaluga a le Fono a Alii ma Faipule. O lenei tali o le a le pine ona unaia tagata latou te galulue faatasi ina ia malupuipuia ma faaleleia le siosiomaga o le gataifale ma ona tamaoaiga mo nei ma tupulaga o le lumanai.

4. O LENEI FUAFUAGA TATAU

4.1 Autu

O lenei fuafuaga ua taua ai ni faatinoga e manaomia ina ia maua ai sona taunuuga maumaututu. O le faamoemoe maualuga o le Malo ina ia faaleleia le soifua manuia o tagata o le afio'aga, ma ia faatupulaia atili mea taumafa mai le sami. O lea e manaomia ai

tagata uma ina ia avea nei faatinoga e puipuia ai le siosiomaga o le gataifale ma ia fuafua tatau ai le fagotaina o i'a ma figota. O nei fuafuaga, na fa'aalia e le Komiti Faufautua o le Va'aia Lelei o i'a ma figota (KFVL) i le afio'aga, e avea ma autu.

“Ina ia puipuia le siosiomaga o le gataifale ma toe faatupulaia i'a ma figota mo tupulaga o le lumanai”.

Ua ioeina e le fonotaga a le Komiti Faufautua mo le Va'aia Lelei o i'a ma figota (KFVL), i le Aso 4 o Novema, 1999 o le Komiti (KFVL) lava lenei latou te faamalosia ma unaia vaega eseese uma o le afio'aga aua le puipuia ma le faasaoina o atinae ma alamanuia o le gataifale o Vaovai. O lenei foi Komiti o loo gafa ma le tapenaga o tulafono aemaise o vaega uma e tatau mo le fuafuaga tatau. O le tele foi o lenei tapenaga, o le a tuuina atu i le pule mamalu a Alii ma Faipule mo le pasiaina. O lenei fuafuaga ua faamoemoe ina ia o'o atu i le tolu tausaga o loo fa'aogaina pea, ae peitai afai ae iai se suiga, ua ao loa ona toe su'esu'eina lenei fuafuaga.

4.2 Tapenaga

O lenei tapenaga sa saunia lava e Alii ma Faipule ma tagatanuu o le afio'aga o Vaovai faatasi ai ma ni fautuaga ma le lagolagosua a le Ofisa o Faigafaiva o le Matagaluega o Faatoaga ma Faigafaiva. O se oototoga lenei o le tapenaga o le Pulega o le Siosiomaga o le Gataitale ma le Va'aia Lelei o i'a ma figota.

Feiloaiga Muamua: O lenei feiloaiga muamua, sa feutagai ai le Ofisa o Faigafaiva ma sui mamalu o le afio'aga i le Aso 5 Oketopa, 1999. O le masina lava o Oketopa sa tauaofia ai le uluai fono a sui o le Ofisa ma le Afio'aga mo le faamalamalamaina ma le taliaina o lenei polokalame.

Vaevaeina i Vaega: O vaega sa vaevaeina iai e aofia ai Matai, Aumaga ma le Vaega a Tina ma Tamaitai. Sa feiloai nei vaega e tolu ma sui o le Ofisa o Faigafaiva ma faatalalanoaina ai faafitauli o le gataifale o loo alia'e i le afio'aga atoa ai ma ni fofu talafeagai e faaono foia ai nei faafitauli.

Sui auai o le Afio'aga i le uluai fono

| | | | |
|---------------------|-------------------|------------------|-------------------|
| Vaega Matai: | Matafi Segalue | Fonoti Tuliai | Vaetui Afiafi |
| | Seuseu Minati | Fonoti Filiga | Talifeau Fono |
| | Matafi Selu | Vaetui Afelē | Tamamasui Faalaga |
| | Soi Faafetai | Soi Fale | Faavae Ionatana |
| | Matafi Teleni | Pologa Popole | Matafi Ofisa |
| | Lealiifano Siaosi | Matafi Tale | Si'a Vitale |
| | Tamamasui Selu | Matafi Tufoa | Misa Asovale |
| | Misa Konelio | Tamasui Alaifata | Mapu Tavita |
| | Soi Iese | Tuisamoa Pi | Falana'i Feti |
| | Talo Mitai | Luaoa Siōvaiata | Ta'amaletoa Fitu |
| | Feaunati Tai'upu | Lauvao Lei'ātaua | Fa'i Fiso |
| | Vaatilalua Faiao | Si'a Mua | Lā'ulu Levi |

| | | | |
|----------------------|--|--|--|
| | Li'isau Mose Faamanu Sigalu | Matuaitoga Tōa'i Te'o Oneone | Matuaitoga Teumālō Matuaitoga Talatofi |
| Vaega Tina: | Aitofi Lauulu Folose Talo Loimata Lesa Felagai Ofisa Masela Pename Nuufou Vili Filorosa Talo | Usulagi Soi Vaitoa Taulia Tuulima Talo Lealofi Lauulu Naotala Aviu Faafou Tolu Laaui Faaiuga | Vavao Misa Katerina Elia Eseese Misa Ula Soi Pefea Sipa Siloma Ioane Fale Siloa |
| Vaega Aumaga: | Faanu Lauulu Fiamalo Sooalo Tenisi Tasi Uili Meki Fuivai Soi Lole Sogi | Pename Leafa Meki Matafi Saamuelu Fonoti Leo Seuseu Taipisa Fonoti Tasi Si'a | Tanielu Mapu Solomona Matafi Soli Si'a Luteru Tuisamoa Moeimanono Papalii Vili Fatiua |

Komiti Faufautua mo le Va'aia Lelei o i'a ma figota (KFVL): I lenei Komiti, o loo aofia ai sui na filifilia mai i vaega taitasi, latou te molia finagalo fa'aalia o vaega eseese i le fonu a le Komiti. O lenei Komiti latou te tuufaatasia faamaumauga ma faamatalaga mai i nei vaega taitasi, ma sa mafai ai ona latou tapenaina se ata faataitai o le Pulega o le Siosiomaga o le Gataifale ma le Va'aia Lelei o i'a ma figota. O lenei fuafuaga o loo aafia ai lagona o tagata o le afio'aga i le puleaina o Faigafaiva ma le siosiomaga o le gataifale.

Sui auai o le Afio'aga i le uluai fonu

| | | | |
|-----------------------|---------------------------------|-----------------------------|----------------------------------|
| Komiti Matai: | Soi Faafeati Paepae Lotovale | Si'a Soli Vaetu'i Afiafi | Talifeau Fono Seuseu Minati |
| Komiti Tina: | Folose Talo La'au Faau'uga | Usulagi Soi | Faafou Tolumai Felaga'i Ofisa |
| Komiti Aumaga: | Toe | Fiamalo Moe | Luteru |

Tauaofiaga o le Fonu Tele: O le a tauaofia lenei Fonu i le Aso 25 Novema, 1999, mo le taliaina, fautuaina atoa ai ma se teuteuga o le fuafuaga muamua o le Pulega o le Siosiomaga o le Gataifale ma le Va'aia Lelei o i'a ma figota.

5. FUAFUAGA FAATAATITIA

O fuafuaga faataatitia o ni gaioga ua faamoemoe e faaono foia ai faafitauli ua fa'aalia ma faailoa mai e vaega eseese o le afio'aga. E lua (2) ituaiga o fuafuaga faataatitia ua fuafuaina ma o le fuafuaga ua aupito sili ona taua o fuafuaga faataatitia lea ua fa'aagaga mo nuu po'o afio'aga. O le isi vaega o fuafuaga faataatitia ua faamoemoe lea mo le Ofisa

o Faigafaiva ma o lenei fuafuaga o le a tuuina atu ai fautuaga ma fesoasoani aua le tapenaina o le faamoemoe e pei ona fuafuaina. O gaoiga uma lava ua faamoemoe e faatino ai fuafuaga faataatitia mo le Ofisa o Faigafaiva e ao ona faamaonia e le Faatonu Lagolago (Faigafaiva) a le Matagaluega o Faatoaga ma Faigafaiva. O nei fuafuaga faataatitia uma ua faamoemoe lo latou faataunuuina i le lagolagosua mai o le afio'aga ma ona tagatanuu. O fuafuaga faataatitia uma o le a leai se aafiaga tuusao a le Ofisa o Faigafaiva, ua i ai le faamoemoe o le a fa'aauau pea ona tuuina atu ni fesoasoani i le afio'aga e ala atu i le faamalalamalaina o pepa o faamatalaga atoa ai ma le faia o ni tautalaga i vaega eseese e pei o aoga ma faalapotopotoga faa-le-ekalesia.

Faamatalaga i i'a a le Afio'aga

Ua faaalua mai e Alii ma Faipule ma le toatele o le afio'aga, o le i'a o le atule ma le i'a sina sa avea lea ma i'a e ae faavaitaimi i le afioaga. Peitai ane ua avea le faaogaina o faigafaiva le talafeagai e iai fanai'a, ava niu kini ma vailaau oona ma isi lava faiva le talafeagai ma faapogai ua ala ai ona le toe va'aia lenei i'a i le gataifale. Ma ua faamalosia ai le faia o tulafono aua le puipuia ma le faasaina o le gataifale o le afio'aga. E mafai ai ona toe faafoi le tamaoiga e pei ona sa iai i le taimi muamua ma aso e tele ua tuanai atu.

5.1 Ina ia faamalosia tulafono faale-nuu e faasaina ai faigafaiva le talafeagai e pei o fanai'a, ava niukini ma vailaau oona.

Otootoga

O nisi o auala tau faigafaiva ua mautinoa lo latou tulaga ogaoga i le faatamaiaina o le alititai (amu) ma le tele o meaola o le gataifale, ma o se faataitaiga o nei ituaiga o faigafaiva le talafeagai, e pei o vaila'au ta-lavalava, ava niukini ma fanai'a. Ua le gata ina faatamaia ai se vaega tele o le alititai (amu) ae ua faapena foi ona faaumiumi ai se taimi e mafai ai ona toe faatupuina le tele o meaola o le gataifale ua a'afia ma mamate i nei ituaiga auala faa-faigafaiva. A faaleagaina le alititai, o lona uiga o le a leai ni i'a ma ni figota e toe maua ai.

Fuafuaga Faataatitia a le Afio'aga

Talu ai ona o le tulaga pagatia ua iai le gataifale o lenei nuu o Vaovai, o lea ua a'e ai se finagalo autasi i le Komiti (KFVL) ua filifilia ina ia toe faamalosia tulafono a le afio'aga sa faia i aso ua mavae, e faasaina ai faigafaiva le talafeagai e pei o fanai'a, ava niukini ma vailaau oona. O le puipuiga ma le faamamaluina o nei tulafono o le a i aao lava o le pule mamalu a Alii ma Faipule faatasi ai ma le lagolagosua a tagatanuu o le afio'aga. O faasalaga uma foi ua tã'ua, sa faamautuina lava e le Komiti ma lo latou manatu, ina ia mafai ona utagia e le afio'aga ma soo se tagata nei tulafono, pe afai o le a pasiaina e le pule mamalu a Alii ma Faipule.

Fautuaga

Ia toe faamalosia ma faamamaluina tulafono ua tã'ua i lalo a le afio'aga mo le faasaina o faigafaiva le talafeagai.

Tulafono

“Mo le mamalu o le atunuu atoa ai ma tagatanuu o Vaovai: Ua matua faasaina lava ona toe faatinoina faigafaiva le talafeagai e ai fanai'a, ava niu kini, ma vailaau oona ma isi lava faigafaiva e faaleagaina ai le gataifale o lenei nuu”

Faasalaga

O le a faasalaina i le \$100 soo se tasi o le afio’aga na te solia lenei tulafono. O tagata mai isi afio’aga, o le a faasalaina i le \$500. Afai ae le usitaia, o le a molia loa i le tulafono a le Malo.

Taimi Fautuaina

Ina ia aloaia le faamamaluina ma le faamalositia o nei tulafono pe a mavae le Fono tele e pasia ai le Pulega o le Siosiomaga o le Gataifale ma le Va’aia Lelei o i’a ma figota i le aso 25 Novema, 1999.

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva mo le faatinoina o fuafuaga faataatitia a le afio’aga e ala atu i lana polokalame fesoasoani ma aoaoga tau faigafaiva.

5.2 Ia faasalalauina tulafono a le Afio’aga

Otootoga

O faasalalauina i leitio, televise ma nusipepa o nisi ia o auala talafeagai lelei e momoli atu ai ni feau taua aemaise ai o le faalauteleina o ni fuafuaga ua saunia. E le gata i lea, o le a silafia ai e le mamalu o le atunuu, malamalama ma manino lelei i le aotelega o le faatauina ma le malu puipuiia o le siosiomaga o le gataifale o le afio’aga

Fuafuaga Faataatitia a le Afio’aga

Ua faaalaina mai e le Komiti (KFVL) le taua o le faasalalauina o tulafono a le afioaga ua faamoemoe ma fa’aagaga mo le puipuiiga o le siosiomaga o le gataifale ma ona tamaoaiga. Ua maea nei ona faasalalauina tulafono a le afio’aga ma ua iai le faamoemoe a le Komiti o le a avea nei tulafono ua fausiaina e avea ma tulafono lagolago a le Malo. E avea foi lea ma auala e faalauaitale atu ai i soo se tagata o alala i le afio’aga o Vaovai ma le mamalu o le atunuu le puipuiina o le gataitale o le afio’aga

Autu o le Faasalalauina: “Puipuiiga o le Gataifale o Vaovai Falealili”

Fuafuaga faataatitia a le Ofisa o Faigafaiva

O tulafono uma a le afio’aga mo le puipuiiga o le gataifale e tatau ona sainia e le Faatonusili o le Matagaluega o Faatoaga ma Faigafaiva ina ia mafai ona avea ai ma tulafono lagolago (by-laws). O le faasalalauina o nei tulafono o le a gafa lea ma le Ofisa o Faigafaiva.

5.3 Ia aoina mai i uta alamea ma faatama’ia ai

Otootoga

O le alamea o se meaola o le ituaiga o le aveau ma e nofo i luga o le a’au. O lenei meaola e na te aiina meaola niniua taua o **polipe** o loo tutupu mai ai amu. A oo ina faateleina lenei meaola o le a faapena ona latou faatamaiaina se vaega tele o le a’au ma avea ai o se tulaga pagatia o le a feagai ma le tele o meaola o loo faalagolago i le a’au mo nofoaga ma mea’ai. E le mafai ona faaumatia pe tapeina le alamea i le vaevaeina o lona tino i le sami, auā e mafai e nei itu tino ona faatupuina mai ai nisi alamea fou, sei’a vagana lava ua

aumaia i uta i le pa'u-mātū e faamagoina ai pe tanuina foi.

Fuafuaga Faataatitia a le Afio'aga

Ua faailoa mai e le Afio'aga, o le alamea o se tasi lea o mafua'aga o le pe o amu o le gataifale. E le gata i le faatamaiaina ai o amu ae aafia ai foi le soifua o tagata faifaiva, ma ua tuuina mai ai e le Komiti se manatu ina ia fatamaia le alamea e ala lea i le aoina mai i uta i le paumatu ma faalala ai, pe fai ai foi se isi o gaoiga e tapeina ai. O lea ua tuuina mai ai e le Komiti Faufautua mo le Va'aia Lelei o i'a ma figota (KFVL) ia fautuaga e pei ona taua.

Fautuaga

Ua fautuaina e le Komiti (KFVL) le au tautai o le afio'aga ina ia latou aoina mai i uta alamea pe a vaaia i soo se vaega o le gataifale. Ua faaalua foi e le Komiti, o le a galulue faatasi le afio'aga i le faatinoina o lenei fuafuaga.

Fuafuaga Faataatitia a le Ofisa o Faigafaiva

E leai se polokalame a le Malo ua fuafuaina e totogi ai le faatama'iaina o le alamea vagana ai ni fautuaga e fesoasoani atu ai le Ofisa o Faigafaiva i auala talafeagai e tineia ai lenei meaola faalafua e ala atu i pepa o faamatalaga ua maea ona saunia.

5.4 Ia faasaina tu'iga ma faamo'a

Otootoga

O amu ua maitauina lona taua i le siosiomaga i le gataifale ona ua mautinoa ua avea lea ma nofoaga o figota ma i'a faapea ma isi meaola o le sami. Afai o le a faatama'iaina amu, o lona uiga, ua afaina foi le tele o meaola o loo nonofo ai. O tuiga, faamo'a ma saeuga, o se tasi lenei o ituaiga o faigafaiva e le talafeagai ua matua faaleagaina ai amu aemaise i'a ma figota laiti. Afai ae faaauauina pea nei ituaiga faigafaiva. o lona uiga o le a sili atu ona tele se afaina o amu o loo fai ma ofaga ma nofoaga o i'a ma figota o le gataifale.

Fuafuaga Faataatitia a le Afio'aga

Na faaalua e vaega taitasi o le afio'aga le tataua ona faia o se tulafono e faasaina ai tu'iga saeuga ma faamo'a i gataifale o Vaovai, aua ua mautinoa le faaleagaina ai o amu ma meaola nini o le gataifale. Ua matua lagolagoina e le Komiti (KFVL) lenei tulafono ua taua i lalo:

Tulafono

“Ua matua faasaina soo se tasi ona toe faatinoina tu'iga, saeuga ma faamo'a i gataifale o Vaovai”

Faasalaga

O tagata o le afio'aga o le a solia lenei tulafono, o le a faasalaina i le \$100.

O tagata mai isi afio'aga o le a faasalaina i le \$500. A le usitaia, o le a molia sao i le tulafono a le Malo.

Fuafuaga Faataatitia a le Ofisa o Faigafaiva

O le a fesoasoani mai le Ofisa i le faamautuina ma le faamalositia o lenei tulafono. O le a mafai foi ona tuuina atu ni pepa o faamatalaga e uiga i mea uma ua tā'ua. E lagolagoina foi e le Ofisa soo se fuafuaga a le afio'aga ua talafeagai lelei ma le tulafono mo le faasaoina o amu.

5.5 Ia faasaina fagotaga mai isi Afio’aga

Otootoga

O fagotaga mai isi afio'aga e faaaogaina ai faigafaiva e le talafeagai e iai ava niukini, fanaia ma vailaau oona, ua mautinoa le matua faaleagaina ai o le siosiomaga o le gataifale. Ua le gata i lea, a ua faaititia ai i'a ma figota o loo manaomia e tagata o le afio'aga mo taumafa.

Fuafuaga Faataatitia a le Afio’aga

Ua faaalua mai e le Komiti (KFVL) le tatau ona faia o se tulafono e faasaina ai nei faigafaiva le talafeagai i lo latou gataifale. O le autu moni o lenei tulafono ona o nei faigafaiva mai isi afioaga o loo aumaia faigafaiva le talafeagai ma faatinoina i lo latou gataifale ma faaleagaina ai.

Tulafono

“Ua matua faasaina lava tagata fagotaga mai isi afio’aga ona faatinoina faigafaiva le talafeagai e pei o fanai’a, ava niukini. vailaau oona, tu’iga. saeuga, faamo’a poo nisi lava faiva le talafeagai i le gataifale o lenei nuu”

Faasalaga

Mo i latou uma e solia lenei tulafono, o le a faasalaina i le \$500. Afai ae le usitaia o le a molia sao loa i le tulafono a le Malo.

Fuafuaga Faataatitia a le Ofisa o Faigafaiva

O le a fesoasoani atu le Ofisa i le faamalosia ma le faamautuina o lenei tulafono

5.6 Ia taofia ona toe lafoai lapisi i le sami

Otootoga

O le lafoai o otaota poo lapisi i le sami ua avea ma mafua’aga o le faateleina ai o namu ma manunua ai nisi o le aufaifaiva i atigiapa, atigifagu, ma uamea. O le lafoina o uamea i le gataifale ua mafua ai ona nuti ma faaleagaina ai le tele o amu o loo nonofo ma ola lelei ai i'a ma figota. Ua faapena ona avea ma puna’aga o faamai ma tulai mai foi o se nofoaga le talafeagai mo le ola lelei o i'a ma figota i le gataifale.

Fuafuaga Faataatitia a le Afio’aga

Ua fautuaina e le Komiti (KFVL) aiga taitasi o le afio’aga, ina ia eliina ni lua i tuāmaota ma tuālaoa, e lafoai i ai otaota ma lapisi. Ua talitonu le Komiti o le auala pito sili lea ona saogalemu ma lelei mo le fo’iaina o lenei faafitauli tau i le lafoaiina o otaota ma lapisi i le gataifale o le afio’aga. O le faatinoina o lenei fuafuaga, o le a i le va’aiga a le Pulenuu, Komiti ma le nuu atoa.

Tulafono

“Ua matua faasaina lava soo se tagata ona toe lafoai uamea, atigifagu, atigiapu, pepu iila ma isi lava ituaiga otaota i gataifale o Vaovai”

Faasalaga

O se tagata o le afio’aga e solia lenei tulafono, o le a faasalaina i le \$100.

Mo tagata mai isi nuu o le a faasalaina i le \$500. Afai ae le usitaia, o le a molia i le tulafono a le Malo.

Fuafuaga Faataatitia a le Ofisa o Faigafaiva

O faamatalaga eseese e faatatau i a'afiaga o le siosiomaga o le gataifale ma ona tamaoaga, o le a fesoasoani atu ai le Ofisa e fautuaina le afio'aga i le taua o le teu maluina o lapisi ma otaota i nofoaga talafeagai. O le a tuuina atu foi ni pepa o faamatalaga mo le faalateleina o le malamalama i ia tulaga.

5.7 Ia faasaina ona toe fagotaina mai i'a ma figota laiti

Otootoga

O le fuafua tatau o le fagotaina mai o i'a ma figota o se itu lelei tele ma talafeagai lea mo le faasaoina ma le toe faatupulaia o meaola o le gataifale. O leni fuafuaga o le a mafai ona maua ai le avanoa e i'a ma figota laiti e tutupu ma fanafanau ai, i le uluai taimi ao lei aveeseina pe fagotaina mai foi. Afai e fagotaina mai se i'a poo se figota ae lei o'o i le lapoa (matua) e fanafanau ai, o lona uiga ua leai sona sao mo le isi augatupulaga e sosoo ai. Afai la o le a faaauau ai pea lea tulaga, o lona uiga, o le a saga faaitiitia pea le faitauaofai o i'a ma figota ma faasolo lava ina mou malie ese atu.

Fuafuaga Faataatitia a le Afio'aga

Ua faaalua e le Komiti (KFVL) lo latou lagolagoina o le Tulafono o Faigafaiva ua pasiaina nei o loo aiaia ai fua faatapulaa o le laiti o i'a ma figota e tatau ona fagotaina. Na taua foi o le faamalositia o leni tulafono, o le a iai pea lea i le pule mamalu a Alii ma Faipule faapea le susuga i le Pulenuu ma le Komiti.

Tulafono

“Ua matua faasaina ona toe fagotaina i'a ma figota laiti mai le gataifale o Vaovai, e pei ona lagolagoina e le pule mamalu a Alii ma Faipule ma le afio'aga atoa, le tulafono a le Malo e avea ma taiala.

Faasalaga

Mo tagata o le afio'aga e solia leni tulafono, o le a faasalaina i le \$100.00.

Mo tagata mai isi afio'aga e fagotaina i'a ma figota laiti i le gataifale o Vaovai, o le a faasalaina i le \$500.00. Afai ae le usitaia, o le a molia sao i le tulafono a le Malo.

Fuafuaga Faataatitia a le Ofisa o Faigafaiva

O le a fesoasoani atu pea le Ofisa i le faamautuina o leni tulafono ma tufaina atu pepa o faamatalaga o nei tulafono ma faamalamalama atili mo le silafia e le mamalu o le atunuu.

5.8 Ia faasao ma faateleina amu

Otootoga

O le puipuia ma le faasaoina o amu, o se tasi lea o auala ua mafai ona toe tutupu ma ola ai amu. O le faateleina o amu, o se itu lelei lea mo i'a ma figota aemaise meaola ninii o le gataifale o loo faalagolago mo meaai ma o latou nofoaga. O le faia o se ogasami faasaoina ma le taofia o taigafaiva le talafeagai o nisi ia o fuafuaga tatau ma le talafeagai mo le faateleina o amu.

Fuafuaga Faataatitia a le Afio'aga

Ua faaalua e le Komiti, o le faiva matalelei /matamalu, o se tasi lea o mafua'aga ua ala ai ona faaitiitia amu i le gataifale o le afio'aga. O le faia o se ogasami faasaoina o se auala

lea ua mautinoa ua mafai ona faasao ma faateleina ai amu. O lenei faasao o le a faatinoaina e le Komiti faapea ai ma le Pule mamalu a Alii ma Faipule. O le vaaia lelei ma le mataituina o lenei faasao o le a feagai lea ma tagatanuu o le afio'aga.

Tulafono

“Ua matua faasaina lava ona toe toesea ni amu mai le vaega o le ogasami faasaoina”

Faasalaga

O tagata o le afio'aga o le a faasalaina i le \$100. O tagata mai isi afio'aga, o le a faasalaina i le \$500. Afai ae le usita'ia, o le a molia loa i le tulafono a le Malo.

Fuafuaga Faataatitia a le Ofisa o Faigafaiva

O le a fesoasoani le Ofisa i le faamalamalamaina o itu lelei o le faasaoina o amu ma tufaina atu foi ni pepa o faamatalaga e faalauiloa atili ai lenei mataupu

5.9 Ia faasa ona toe taina ma faatama'ia togatogo

Otootoga

O togatogo o se tasi lenei o vaega ua tele sona sao i le gataifale mo le faatupuina o nisi i'a ma figota. O le taua o le faasaoina o togatogo ona o nisi meaola ninii o le gatafale ua avea lea ma nofoaga ma vaega e sulufai iai mai o latou fili, a'o nisi i'a ma figota, ua avea togatogo ma nofoaga e fanafanau ma tautuufua ai. A tanumia pe taina i lalo ma faaleagaina togatogo, o lona uiga o le a faaitiitia i'a ma figota mo tupulaga o le lumanai.

Fuafuaga Faataatitia a le Afio'aga

Ua ioeina e le Komiti (KFVL), le tatau ona faamalosia le faasaoina o le togatogo ona o le fia faasaoina pea o i'a ma figota ma isi meaola o loo avea lea vaega ma nofoaga e fanafanau ai. O le faasaoina o lenei togatogo, o le a faamamaluina e le Pule mamalu a Alii ma Faipule o le afio'aga o Vaovai Falealili.

Tulafono

Ua matua faasaina lava ona toe taina i lalo ma faatama'ia togatogo o loo ola i totonu o lenei afio'aga sei vagana ai ua manaomia mo vai a tamaiti ma e gasegase.

Faasalaga

O tagata o le afio'aga e solia lenei tulafono, o le a faasalaina i le \$100.

O tagata ese mai isi afio'aga, o le a faasalaina i le \$500. Afai ae le usita'ia, o le a molia i le tulafono a le Malo.

Fuafuaga Faataatitia a le Ofisa o Faigafaiva

O le a tuuina atu e le Ofisa ni pepa o faamatalaga e faatatau i le taua ma le aoga o togatogo, e faamalamalama atili ai lenei mataupu.

5.10 Ia faasaina upega ma tili matanini'i

Otootoga

O le faaaogaina o upega ma tili matanini'i, ua maitauina le tele o i'a laiti ua faatama'iaina ai. Ua iai le talitonuga, o le a oo atu i se tulaga faaletonu i'a maua pe a faaauauina pea le faaaogaina o nei ituaiga faigafaiva. O le a oo ina faaitiitia i'a e mafai ona oo atu lo latou lapopoa e maua ai le avanoa e fanafanau ma tautuufua ai.

Fuafuaga Faataatitia a le Afio'aga

Ua faailoa mai e le Komiti (KFVL), o le faaaogaina o upega ma tili mataninii, o se tasi lea o mafuaaga ua faaitiitia ai i'a maua i le gataifale. Ua faapea foi ona faailoa mai e le Komiti lo latou lagolagoina o le tulafono a le Malo ua iai nei mo le faatapulaaina o mataupega ma tili.

Fautuaga

Ua fautuaina e le pule mamalu a Alii ma Fsaipule le Komiti, atoa ai ma le mamalu o le afio'aga, ina ia lagolagoina le tulafono o upega ma tili mataninii ua pasia e le Malo.

Tulafono

Ua matua faasaina lava mataupega e i lalo ifo o le 2 inisi, mo upega tatao ma tili, ia le silia i le 1.2 inisi ona mataupega, ona toe faaaogaina i ni fagotaga i le aloalo o Vaovai.

Faasalaga

Mo tagata o le afio'aga e solia lenei tulafono, o le a faasalaina i le \$100. O tagata mai isi afio'aga e maua o faaaogaina nei upega i gataifale o Vaovai, o le a faasalaina i le \$500. Afai ae le usitaia, o le a tuuina sao loa i le tulafono a le Malo.

Fuafuaga Faataatitia a le Ofisa o Faigafaiva

O se lagolaosua mai le Ofisa o Faigafaiva e ala i lana polokalame fesoasoani o le tuuina atu lea o faamatalaga e saga faamautuina ma faamaopoopoina ai lenei tulafono.

5.11 Ia faasaina ona toe aoina fugafuga, mama'o ma sea ma isi figota o lenei ituaiga mo le faatauina atu i maketi i fafo.

Otootoga

O figota e pei o fugafuga, sea ma isi o lenei ituaiga, o loo faatauina pe faaaogaina foi mo taumafa, e le mamalu lautele o le atunuu. O nei figota e faigofie ona fagotaina ona e tle ina ola ma aumau i vaega papa'u o le gataifale. Talu ai le faigofie ona fagotaina o nei ituaiga figota, ua iai le popolega, e faaono tulai mai ia le faaitiitia o nei tamaoiga i se taimi o le lumana'i pe a faaauauina pea ona fagotaina mo le faatauina atu i maketi i fafo.

Fuafuaga Faataatitia a le Afio'aga

Na faailoa mai e le Komiti (KFVL), o le soona fagotaina o fugafuga ma isi onei ituaiga figota mo maketi i fafo, ua mafua ai ona faaitiitia ma tau le toe maua ai nei figota i gataifale o le afio'aga, ma ua faapea ai ona fautuaina le fausiaina loa o se tulafono e puipuia ai lenei faafitauli.

Tulafono

Ua matua faasaina ona toe fagotaina fugafuga ma isi o lenei ituaiga mo le faatauina atu i maketi i fafo, ae vagana ai mo le tausiga o aiga ma faatau atu i le maketi i le taulaga.

Faasalaga

O se tagata o le afio'aga e solia lenei tulafono, o le a faasalaina i le \$100. O tagata mai isi afio'aga e solia lenei tulafono, o le a faasalaina i le \$500. A le usita'ia, o le a molia sao i le tulafono a le Malo.

Fuafuaga Faataatitia a le Ofisa o Faigafaiva

O le a tuuina atu e le Ofisa ni fautuaga ma ni faamatalaga e faatatau i olaga ma ni auala

talafeagai e fagotaina ai nei figota.

5.12 Ia faasaina le faaaogaina o mea-manava (fagu'ea) ma moli-uila i faigafaiva i po.

Otootoga

O le faaaogaina o moli-uila ma mea-manava i faigafaiva, ua molimauina ai le tele o i'a ma figota e mafai ona fagotaina mai ai. Ua iai le talitonuga, o le a oo atu i se tulaga faaletonu i'a ma figota maua mai gataifale pe a faaauauina pea ona fagotaina nei ituaiga o mea fagota. O le a oo ai ina faaitiitia i'a ma figota e mafai ona oo atu lo latou lapopoa e maua ai le avanoa e tautuufua ma fanafanau ai.

Fuafuaga Faataatitia a le Afio'aga

Ua fautuaina e Aliima Faipule atoa ai ma aumaga o le afio'aga le taofia ma faasaina loa le faaaogaina o moli-uila i faigafaiva i lama i le po. Sa iloiloina e le Komiti (KFVL) lenei fautuaga, ma fautuaina ai loa le Fono ina ua faavaeina se tulafono e faasaina ai le toe faaaogaina o moli-uila ma mea manava i faigafaiva.

Fautuaga

Ia aloa'ia ma faamalositia loa lenei tulafono e faasaina ai le faaaogaina o moli-uila ma mea-manava i faigafaiva.

Tulafono

Ua matua faasaina ona toe faaaogaina moliuila ma mea-manava mo fagotaga i gataifale o lenei afio'aga

Faasalaga

Soo se tasi o le afioaga na te solia lenei tulafono, o le a faasalaina i le \$100. O tagata mai isi afio'aga e faaaogaina nei faigafaiva i Vaovai, o le a faasalaina i le \$500. A le usita'ia, o le a molia i le tulafono a le Malo.

Fuafuaga Faataatitia a le Ofisa o Faigafaiva

O le a fesoasoani mai le Ofisa o Faigafaiva i le faia o ni polokalame e faatatau i le aafiaga o le gataifale ma ona tamaoaiga mai le faaaogaina o nei mea fagota.

5.13 Ia taofia le la'ueseina o oneone mai le gataifale o le afio'aga.

Otootoga

O le faateleina o apitagalu ma matafaga mai le fetafeaiga o au ma galu malolosi, ua faapogai mai lea ina ua tele se vaega o oneone o le matafaga poo apitagalu, ua toesea pe asuina. Ua avea foi le asuina o le oneone ma mafu'aga ua faaitiitia ai ona toe ofaga le tele o meaola o loo aumau i nei vaega o le gataifale.

Fuafuaga Faataatitia a le Afio'aga

O le a iloiloina e le Komiti (KFVL) le tulaga mo le faatagaina o le la'ueseina o le oneone mai le gataifale o Vaovai.

Tulafono

Ua matua faasaina lava ona toe la'uina le oneone i faiga e le talafeagai ai, mai le gataifale o le Vaovai, seia vanaga ua feutagai ma Alii ma Faipule atoa ai ma le Komiti o le

gataifale.

Faasalaga

Soo se tasi o le afio'aga na te faatagaina se tasi mai isi afio'aga e la'uina le oneone e aunoa ma se faatagana mai Alii ma Faipule o le afio'aga, o le a faasalaina i le \$500. o tagata mai isi afio'aga, o le a faasalaina i le \$500. Afai ae le utagia mai, o le a molia loa i le tulafono a le Malo.

Taimi Fautuaina

Ia aloaia le faamamaluina ma le faamallosia o nei tulafono pe a mavae le Fono tele e pasia ai le Fuafuaga o le Pulega o le Siosiomaga ma Faigafaiva, i le Aso 25 o Novema, 1999.

Fuafuaga Faataatitia a le Ofisa o Fiagafaiva

O le a fesoasoani atu le Ofisa o Faigafaiva i le faamautuina o fuafuaga a le afio'aga ma lagolagoina foi le mataupu e uiga i le la'ueseina o oneone ma le gataifale o Vaovai.

5.14 Ia iloilina le tulaga talafeagai o le faasaoina o se vaega o le gataifale o le afio'aga.

Otootoga

O se vaega o le gataifale ua faasaoina, tatau ona le toe aafia i ni faigafaiva. O le avea o se vaega o le gataifale ma vaega faasao, e ao ona aafia ai le malu puipuia o le siosiomaga ma ona tamaoaiga i figota ma i'a. o lenei vaega faasao, o le a faasaoina ai amu, a'au faapea foi ma i'a, ina ia mafai ona maua e nei meaola le avanoa e tautuufua ma fanafanau ai. O le autu taua lava, o le a avea lenei faasao ma puna'aga o i'a ma figota e mafai ai ona toe faaleleia nisi vaega o le gataifale ua afaina. O le a fanafanau ma tautuufua i'a ma figota o loo aumau i le vaega faasaoina, ma tafe atu o latou fua fanau ma faatupuina ai nisi meaola fou, i nofoaga ua le maua ai ni i'a ma ni figota. O le a le pine ae manuia ai i tatou, ae faapea foi tupulaga o le lumana'i.

Fuafuaga Faataatitia a le Afio'aga

O le afio'aga e ao ona:

- Galulue faatasi ma lagolagosua i le aufaigaluega a le Ofisa o Faigafaiva i le faatinoina o le iloiloga o le tulaga talafeagai, e avea ma vaega faasaoina.
- Talanoa ma auiliiliina le lipoti ma ia faia se faaiuga i le faavaeina o le vaega faasaoina.

Afai ae finagalo le Fono i se tasi, poo fuafuaga uma ua ta'ua:

- Ia faatinoina loa fuafuaga mo le faavaeina o le vaega faasao, e pei o le mata'ituina, tausiga ma le va'aia lelei o se vaega ua atofaina.
- Ia faamamalu foi le tulafono ua ta'ua i lalo, mo le puipuia lavao le ogasami faasao.

Tulafono

Ua matua faasaina lava soo se tagata ona toe uia, taele pe solia, poo le faatinoina ai foi o soo se ituuiga faigafaiva, poo se isi lava mea i totonu o lenei ogasami faasao i Vaovai Falealili

Faasalaga

Soo se tagata o le afio'aga na te solia lenei tulafono, o le a faasalaina i le \$100.

O tagata mai isi afio'aga, o le a faasalaina i le \$500. A le usita'ia, o le a molia sao i le tulafono a le Malo.

Fuafuaga Faataatitia a le Ofisa o Faigafaiva

O le Ofisa o Faigafaiva o le a:

- Faatinoina le iloiloga o le tulaga talafegai o se vaega o le gataifale e avea ma vaega faasaoina
- Saunia le lipoti mo le tuuina aloa'ia atu i le Komiti o le Pulega o faigafaiva ma le Fono

Afai ae finagalo le Fono i se tasi, poo fuafuaga uma ua ta'ua:

Pe a tusa ai, o le a tuuina atu ni fautuaga ma ni faamatalaga mo le tausiga, pulea ma le va'aia o le vaega faasaoina o le gataifale o le afio'aga.

5.15 Ia iloilina le tulaga talafegai ma le lelei o le gataifale mo le tufaina atu male faafaato'againa o nisi figota.

Otootoga

O le tufaina atu ma le faafaatoagaina, ua faatatau lea i le auina mai o ni figota poo ni i'a mai isi atunuu e faaolaina i se ogasami ua talafeagai lelei. O le faafaatoagaina ua faatatau lea i le faaolaina o figota i se nofoaga ua saunia lelei. O nisi nei o atina'e mo le faatupuina o figota aua le toe faatamaoagaina o le gataifale mo taumafa a se afio'aga. O nei auala faaatina'e, e moomia ai lava le galulue faatasi ma le faamaoni o le afio'aga ina 'ia 'ausia se taunu'uga lelei.

Faamatalaga faaopopo o le tufaina atu o figota

O le tufaina atu, ua faatatauina lea i le aumaia o ni figota poo se ituaiga o figota mai se isi atunuu e faaolaina i se ogasami ua talafeagai lelei. O le tufaina o le figota o le alo'ao i le tele o atunuu o le Pasefika, ua mautinoa ai le tele o ni faamanuiaga na mafai ona seleseleina e nei atunuu. I Fiti, na mafai ona toomaga iai tagata i le 'a'ano o le 'ali'ao e avea ma mea-taumafa. O lona atigi na mafai ona faatauina atu e gaosi ai faamau o ofu i fale gaosi mea. I le Atu Kuki, e tusa ma le 280 'ali'ao na tufaina atu iai, ma na maua mai ai se aofa'iga e tusa o le 200 tone o atigi 'ali'ao i lea tausaga, ma na faatauina i fale gaosi faamau. I le 1990, na tufaina atu ai i sami o le motu o Namu'a i Aleipata le 40 'ali'ao, ma na faatama'iaina e le afa malosi o Ofa.

I le tele o ogasami o le aloalo ma 'a'au o Samoa, o loo maua ai figota e pei o le pae, asi ma tugane. O nei figota ua mautinoa lo latou faaitiitia talu ai o le so'ona fagotaina e tagata mo mea-taumafa, ae ua faapena foi ona faatama'iaina o latou nofoaga e afa malolosi. I le tele o nofoaga ua le toe maua ai nei figota, pau le faamoemoe, o le 'aumaia lea o ni figota mai isi atunuu ma tufaina atu iai aua le faaolaina i nei vaega o le gataifale.

Fuafuaga Faataatitia a le Afio'aga

E ao i le afio'aga ona:

- Galulue faatasi ma le aufaigaluega a le Ofisa o Faigafaiva i le faatinoina o le iloiloga pe talafeagai ma lelei le gataifale o Vaovai Falealili i le tufaina atu ma le faafaatoagaina ai o figota.
- Auiliilina o le lipoti i suesuega o le talafeagai o le gataifale, ma ia faia se faaiuga i le faatinoina o nei atinae i totonu o le afio'aga.
- Galulue faatasi mo le puipuia o le atina'e ma le va'aia lelei o tagata o loolatou faatama'iaina ma solia tulafono e faatatau i nei atina'e.

Fuafuaga Faataatitia a le Ofisa o Faigafaiva

O le a oo atu se Alii Ofisa mai le vaega suesue, ma suesueina le gataifale o le afio'aga, ina 'ia faamaonia le talafeagai mo le faaolaina ai o ni figota. O le a mafai ona tuuina atu ni figota pe afai o le a faamaonia le talafeagai o nei nofoaga mo ia atina'e.

Pe a faataunuuna leni fuafuaga:

- Fesoasoani mai le Ofisa e ala lea i le va'aia male sologa lelei o le tuputupu a'e o figota ua atina'eina
- Saunia ni aoaoga mo le faamalamalamaina o olaga faanatura o nei figota

5.16 Ia una'ia faigafaiva i tua'au ma aoaoga mo faigafaiva.

Otootoga

E mafai ona faaleleia le tamaoiga o i'a ma figota maua i aloalo, ma a'au ma vaega o le gataifale ua faaleagaina, pe afai ae faaititia le fagotaina o nei vaega ole gataifale. o se tasi o auala e faaleleia ai le tamaoiga o le gataifale, o le fagotaina lea o ogasami o le gataifale e lei fagotaina lava, aemaise o tua'au mamao.

Fuafuaga Faataatitia a le Afio'aga

Ua iai le talitonuga i le Komiti (KFVL), e ao ona una'ia ma faamalosia faigafaiva i tua'au ma a'au mamao, ina ia tuumamaina ai le fagotaina o i'ama figota o le a'au male aloalo. Ua le gata foi i lea, ae o le a mafai ai ona toe faatupula'ia ma faaleleia le tamaoiga ole tele o vaega o le gataifale, aemaise i le aloalo ua faaleagaina. Ua talosagaina foi le Ofisa o Faigafaiva ina 'ia faatinoina se aoaoga i auala tau-faigafaiva e aoaoina ai le autautai o le nuu, ma ia faatautaia e se Alii Ofisa o Faigafaiva ua iai se tomai faapitoa i mea tau faigafaiva.

Talu ai ona o le tele o nuu e leai ni vaa e talafeagai mo fagotaga i tua'au, o lea ua taumafai ai le Ofisa o Faigafaiva e saili fesoasoani mo le faafaigofieina o le mauaina o ni vaa talafeagai mo lea faamoemoe. O le a iloiloaina foi e le Ofisa o Faigafaiva mana'oga i auala tau-faigafaiva e ao ona fesoasoani ai e aoaoina le mamalu o le au-tautai a le afio'aga. O itu taua o le a a'afia i nei aoaoga, e pei o le teuina ma le va'aia lelei o i'a, saogalemu i luga o le sami, tausiga o afi o vaa, faaasuina o i'a, ma isi lava mataupu taua.

Faamatalaga Faaopoopo

Vaa mo fagotaga i tua'au: O le leai o ni vaa talafeagai mo fagotaga i tua'au, o le ala lea ua avea ma vaegase i le una'ia o faigafaiva i tua'au. I sailiiliga a le Ofisa o Faigafaiva i se vaa talafeagai, ua filifilia ai le va e i va o le 14 – 16 ft, o lona tau e \$9,800, tuufaatasi iai ma lona afi (15HP), ma nai mea fagota, o le taula, ofu faaola mo le saogalemu i luga ole sami, ma foe. O loo iai se fesoasoani a le Faalapotopotoga o le Iuni a Europa (EU) mo le faatupeina o le 65% o le tau atoa o le vaa (\$9,800), o le 35%, o le sao lea o se afio'aga poo se faalapotopotoga ua auai i le polokalame a le Vaega o Faigafaiva.

O leni ituaiga vaa, e mafai ona faa'auvaaina e ni tagata se toalua pe toatolu foi, ma e mafai ona faaogaina leni vaa i faigafaiva i tua'au. O le a faia foi ni aoaoga mo le saogalemu i luga o le sami, teuina ma le va'aia lelei o i'a, tausiga o vaa, atoa ai ma le faiga o mea fagota.

5.17 Ia faaaogaina le Mana o Talosaga.

Otootoga

O talosaga ma talitonuga tuufaatasi faalelotu o se tasi lea o faamoemoega ua talitonuina lona taua aua le puipuia ma le faasaogalemuina o le siosiomaga o le gataifale ma ona tamaoaiga.

Fuafuaga Faataatitia a le Afio'aga

O le sao taua o le aufailotu, o le una'ia lea ma faamalosi'au i tagatanuu ina ia latou faatauaina le taua o le puipuia ma le faasaoina o le siosiomaga o le gataifale ma ona tamaoaiga. O se sao taua tele le tapu'eina o finagalo o tagata ina ia galulue faatasi aua le fo'ia o faafitauli o loo ali'ae mai i le siosiomaga o le gataifale ma ona tamaoaiga. Na ta;ua e vaega eseese o le nuu le aoga ma le taua o talosaga mo le fo'ia o faafitauli o loo feagai nei ma faigafaiva ma le siosiomaga o le gataifale o Vaovai Falealili. Sa lagolagoina foi e le Komiti (KFVL) lenei fautuaga ma fautuaina ai le taupati faatasi o le aufailotu ma le mamalu o le afio'aga i lenei faamoemoe.

Fuafuaga Faataatitia a le Ofisa o Faigafaiva

O le a mafai ona tuuina atu ni fesoasoani mai le Ofisa o Faigafaiva mo le mamalu o le Aufailotu e ala i pepa o faamatalaga ma tautalaga ina ia fesoasoani i le fausiaina o a latou lauga ma aoaoga mo le puipuia ma le faasaoina o le siosiomaga o le gataifale ma ona tamaoaiga.

6. TALOSAGA

6.1 Talosaga a le Afio'aga

O nei talosaga sa mafai ona tuuina mai e sui o le afio'aga, sa auai i fonotaga ma le Ofisa o Faigafaiva i taimi o faatalatalanoaga i vaega e tolu. O talosaga uma foi la sa tuuina mai, sa faamautuina e le Komiti (KFVL) i le latou fonotaga ma le Ofisa. Pe a talafeagai, o nei talosaga o le a mafai ona iloiloaina e le Ofisa o Faigafaiva mo le faataunuuna pe a maea le taliaina o lenei tusi e le Pule mamalu a Alii ma Faipule i le Fono tele e faia i le Aso 25 o Novema, 1999. o talosaga uma sa tuuina mai o loo faailoa atu i lalo.

- Ogasami Faasaoina
- Vaa Fagota
- Tilapia
- Tugane
- Faisua
- Aoaoga i mea tau faigafaiva: (fausiaina o mea fagota, tausaiaina o afi o vaa, tausai o faisua, tilapia, ma isi aoaoga)

7. TOE ILOILOINA O LENEI FUAFUAGA TATAU

Otootoga

O lenei fuafuaga ua faaalua ona o se toe iloiloaina o lenei Fuafuaga Tatau mo lona aga'i i

luma atoa ai ma lona toe suesueina ina ia faailoa ai le taua ma le aoga o lenei polokalame i totonu o nuu ma afio'aga. Atoa ai ma se auiliiliga maumaututū i le tulai mai o galuega fai a le Afio'aga ma le Ofisa o Faigafaiva i le faataunuuina o a latou fuafauaga faataatitia. O lenei foi iloiloga, e lipotia ai le alualu lelei ma ni faaletonu i totonu o le Polokalame talu ona faavaeina i totonu o le afio'aga.

Fuafuaga Faataatitia a le Afio'aga ma le Ofisa o Faigafaiva

Ua iai le maliliega a le Komiti (KFVL) a Vaovai ma le Ofisa o Faigafaiva o le a auiliiliina lenei Fuafuaga Tatau pe a mae'a le ono (6) masina talu ona pasia lenei tusi i le Fono Tele i le Aso 25 o Novema, 1999. O le a toe feutaga'i le Komiti male Ofisa i se aso o le a atofaina pe a atoa le 6 masina.